

# APAI SALI



BORNEO LITERATURE BUREAU

# APAI SALI

*Ditulis*

HARRY NYANGO

*Gambar digaga*

HARRY ANDING




Apai Sali




SAR00019507

PUSAT DOKUMENTASI MELAYU  
DEWAN BAHASA DAN PUSTAKA



BORNEO LITERATURE BUREAU

© BORNEO LITERATURE BUREAU, 1967



*Dichelak*

SOUTH CHINA MORNING POST, LIMITED  
HONG KONG

## GENTERAN

*Telian*

*Daun*

Merau Ngena Kerubong Lelabi .. .. . 1

Mandok Paku Lawang .. .. . 9

Nyumpit .. .. . 15

Manjok Burong .. .. . 23

Nampal Tanah Merekah .. .. . 29

Besilih Rumah .. .. . 34

Parai Bini .. .. . 39

## MERAU NGENA KERUBONG LELABI



PAGI SITI Apai Sali enggau anak iya ngaga bubu. Sahari-hari seduai ngaga bubu. Samoa bubu digaga seduai saratus iti. Siti nya besai ari samoa bubu bukai. Pemesai moa bubu siti nya umbas alai bediri. Peninggi iya nyentok di sadau. Hari pan nyau udah ngalih, alai Apai Sali enggau anak iya ke benama Sali lalu belaboh nurun ngagai sungai. Dia seduai lalu berengkah nan bubu. Tan seduai iya bubu ari ulu mansang kili. Tan bubu Apai Sali nyelai bendar moa tunga kulu lalu burit tunga kili. Bubu seduai iya nyau tembu tan, hari pan malam. Ai sungai pan apus ga alai seduai nan bubu.



Ukai anchi-anchi pemanjai ai sungai nya apus meh alai seduai iya nan bubu. Bubu ke besai ditan seduai ba nanga sungai. Sungai nya benanga ba ai tasik besai. Tembu seduai nampun ka bubu besai, seduai menyanak lalu pulai ka rumah.

Datai seduai di rumah, dia bini iya benama Enchelegit lalu berapi. Asi pan mansau, sida menyanak lalu makai. Uдах badu makai, dia Apai Sali lalu mupok tindok laban lelak udah bekau nampun ka bubu. Umba agi mega Api Sali ka ngiga mimpi. Engka icha bubu ke udah ditan iya bulih ikan. Tak enda berasai iya tindok, ensepi diri tekenyit ninga manok mengkukok madah ka hari teberingkas tawas.

“Ak-ak! Oh-oh! Tawas hari anak. Aram tua ngabas bubu. Manah amat mimpi aku demalam. Mimpi asai ka diberi orang buah rampu dua lanji,” ko iya.

“Aram meh apai ngicha ka bubu tua bulih ikan lagi,” pia ko saut anak iya, Sali.

“Oh Indai Duat! Nuan berapi anang periok ka mit, enggai ka asi enda umbas. Bisi sampau ke besai nyin nya kena nuan berapi,” pia ko Apai Sali ngajar bini iya.

Uдах nya baru seduai nurun ka sungai. Datai seduai di sungai, lalu dulu ngabas bubu ari ulu, indah enda baka gaya seduai ke nan iya kamari.

Nyah, angkat ka iya bubu keterubah mampul ulu bendar nadai ga bulih ikan.

"Oh! Iga Petara enda nyui ka burit ngasoh bubu aku bulih ikan," ko jako Apai Sali.

Datai ba bubu siti, angkat ka iya nadai ga bulih ikan. Dia iya muchau. "Akai apai! Akai indai! Iga ga ikan tu bengat enggai tama bubu aku. Eh, bula mimpi aku demalam," ko iya.

Datai ba bubu siti ari ili nya nadai ga bulih ikan. Nama utai ka ulih. Iya ga semina daun aja bisi menoh ka bubu, laban bubu tan seduai moa tunga kulu. Bubu nyau abis diangkat ka seduai lalu nadai ga bulih ikan siko. Semina bubu siti ke besai aja empai diangkat ka seduai.

Datai seduai di nanga sungai nya, dia lalu diangkat ka Apai Sali bubu. Angkat ka iya enda ga ulih, angkat enda ga ulih. Meda bubu lalu enda ulih angkat ka apai iya Sali lalu nulong iya. Tak nyau bebendar seduai menyanak ngangkat ka bubu, nya baru iya lalu terangkat. Peda besimbor ai jamah lelabi dalam bubu. Peda seduai lelabi dalam bubu nadai utai ngemesai-mesai nya. Kerubong kering iya ngaum kapir bulih tiga depa. Pala lelabi nya besai agi ari buah kepayang.

Sali lalu manjong. "Apo apai! Besai amat lelabi ulih bubu tua deh!" ko iya.

"Eh, ukai nya lelabi! Daun mengkubong nya. Daun mengkubong nya anak," ko Apai Sali.

"Ukai nya daun mengkubong deh apai. Lelabi nya apai. Peda iya ngerayap deh," ko Sali.

"Kati ko enda ngerayap, bubu ga digusak aku. Daun mengkubong nya, daun mengkubong," ko Apai Sali.

Datai di rumah Apai Sali lalu bekindu laban chelap. Leboh iya bekindu; nyadi iko sirat iya ditunu iya ba api, laban iya deka mai api kena nunu lelabi.

"Oi, Indai Duat! Aku deka bira! Seduai Sali anang nganti aku makai," pia ko iya.

Nurun iya ari rumah, lalu terus mansang ngulih ka lelabi dalam bubu.

"Kati ko Sali, bisi bulih ikan bubu seduai apai nuan?" ko Indai Sali nanya iya.

"Bisi! Bisi lelabi peda aku dalam bubu. Tang apai ngumbai iya daun mengkubong," ko Sali nyaut indai iya.

"Manah tua nurun nitih ka apai nuan. Tentu iya nunu lelabi, lalu makai nengali nya kadiri," pia ko Indai Sali.

Leboh iya nunu lelabi, dia deh Sali enggau indai iya ngaga diri munyi ngingit.

"Ngit! Ngit! Ngit! Meri pah sapiak! Enti nuan enggai meri, aku kebok leka mata nuan lagi," ko Ngingit.

Apai Sali lalu takut ninga Ngingit. "Oh! Antu nama, antu apa bengat bam minta pah lelabi. Enggai



aku dikebok nuan leka mata!" ko iya. Lalu ditikau ka iya pah lelabi siti.

Udah nya agi ga Ngingit bemunyi baru. "Ngit! Ngit! Ngit! Meri agi pah sapiak. Enti nuan enggai meri, kebok leka mata nuan lagi!" ko Ngingit.

"Eh, nyau abis pah lelabi tu dipinta ngingit nya. Nya nyah! Badu agi nuan minta. Nyau abis lelabi aku tu," ko Apai Sali.

Ngingit seruran majak minta isi lelabi ari Apai Sali. Iya laban takut ka Ngingit ngebok mata, seruran nikau ka isi lelabi nya ngagai tunga nyawa Ngingit nya tadi. Mina perut enggau tulang agi tinggal enda diberi iya ngagai Ngingit.

"Eh, begah-begah ga Ngingit tu! Nya asai kitai takut. Nya ga iya minta lelabi. Nyau abis tu, nadai agi diempa aku," ko iya bejako kadiri.

Kengka lelabi ka agi tinggal nya tadi lalu dipansoh iya dalam ruas. Udah iya kenyang makai pansoh lelabi, iya lalu ninggal ka pansoh ba tebing semak nya. Udah nya iya lalu mupok merau ngena kerubong lelabi. Dia iya belagu:

"Rising-rising iko salai.

Sali seduai indai iya alah akal aku.

Aku ngumbai daun mengkubong.

Sali ngumbai lelabi."

**BAHAN SELANJUTNYA BOLEH DIDAPATI DI:**

**KOLEKSI BORNEO**

Pusat Dokumentasi Melayu Tun Hamdan Sheikh Tahir,  
Dewan Bahasa dan Pustaka Cawangan Sarawak,  
Jalan Tun Datuk Patinggi Abd. Rahman Yaakob,  
Petra Jaya,  
93050 Kuching, Sarawak.

Telefon: 082 – 227 000/ 048

Faksimile: 082-227 088

Emel: [eborneo@dbp.gov.my](mailto:eborneo@dbp.gov.my)

**"Memelihara Warisan Memupuk Wawasan"**

